



Broj: 05/1-50-15-26-33-6/24
Sarajevo, 2.2.2024.

PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM
DOM NARODA



BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO:			
Organizaciona jedinica	Klasifikaciona oznaka	02. 02. 2024 broj	Broj priloga
01.02-50-15		512/24	

PREDMET: Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2023. godinu

Poštovani,

U skladu sa članom 7. stav (1) tačka e) Zakona o nezavisnim i nadzornim tijelima policijske strukture Bosne i Hercegovine ("Službeni glasnik BiH" broj 36/08) i članom 9. Poslovnika o radu Nezavisnog odbora kao nezavisnog tijela policijske strukture BiH ("Službeni glasnik BiH" broj 93/09) Nezavisni odbor je na 33. sjednici održanoj 24. 1. 2024. godine usvojio Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2023. godinu i dostavlja ga Parlamentarnoj skupštini BiH na usvajanje.

S poštovanjem,



Prilog: Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2023. godinu na bosanskom, hrvatskom i srpskom jeziku

Dostavljeno:

- Naslovu
- a/a



Broj: 05/1-50-15-26-33-5/24

Sarajevo, 24. 1. 2024.

IZVJEŠTAJ

o radu Nezavisnog odbora kao nezavisnog tijela policijske strukture
Bosne i Hercegovine za 2023. godinu

Januar 2024. godine

SADRŽAJ

POGLAVLJE I. UVODNE NAPOMENE	3
POGLAVLJE II. NADLEŽNOSTI NEZAVISNOG ODBORA	4
POGLAVLJE III. IZVRŠAVANJE ZADATAKA IZ NADLEŽNOSTI NEZAVISNOG ODBORA.....	4
Odjeljak A. Realizacija zadataka održavanjem redovnih sjednica Nezavisnog odbora...5	
Odjeljak B. Realizacija zadataka održavanjem sastanaka s rukovodiocima policijskih tijela BiH u skladu s Planom rada za 2023.	15
1. Posjeta Graničnoj policiji BiH, 14. 11. 2023.	16
2. Posjeta Državnoj agenciji za istrage i zaštitu, 16. 11. 2023.	18
3. Posjeta Direkciji za koordinaciju policijskih tijela BiH, 4. 12. 2023.	20
POGLAVLJE IV. SARADNJA S MEĐUNARODNIM ORGANIZACIJAMA I OSIGURANJE JAVNOSTI RADA.....	22
POGLAVLJE V. ADMINISTRATIVNO-TEHNIČKA PODRŠKA RADU.....	22
POGLAVLJE VI. PREPORUKE I ZAKLJUČCI.....	22

Na osnovu člana 7. stav (1) tačka e) Zakona o nezavisnim i nadzornim tijelima policijske strukture Bosne i Hercegovine i člana 9. tačka e) Poslovnika o radu Nezavisnog odbora kao nezavisnog tijela policijske strukture Bosne i Hercegovine, Nezavisni odbor je na 33. sjednici, održanoj 24. 1. 2024, usvojio i Parlamentarnoj skupštini Bosne i Hercegovine podnosi sljedeći

I Z V J E Š T A J

o radu Nezavisnog odbora kao nezavisnog tijela policijske strukture Bosne i Hercegovine za 2023. godinu

POGLAVLJE I. UVODNE NAPOMENE

Nezavisni odbor osnovan je Zakonom o nezavisnim i nadzornim tijelima policijske strukture Bosne i Hercegovine („Službeni glasnik BiH“, broj 36/08), kao nezavisno tijelo Parlamentarne skupštine BiH.

Nezavisni odbor ima devet članova koji su imenovani na mandat od četiri godine odlukom Parlamentarne skupštine BiH („Službeni glasnik BiH“, broj 10/21).

Nezavisni odbor kao nezavisno tijelo policijske strukture BiH (u daljnjem tekstu: Nezavisni odbor) tijelo je Parlamentarne skupštine BiH s nadležnostima utvrđenim Zakonom o nezavisnim i nadzornim tijelima policijske strukture BiH („Službeni glasnik BiH“, broj 36/08) i Poslovníkom o radu Nezavisnog odbora („Službeni glasnik BiH“, broj 93/09). Na osnovu člana 5. st. (1) i (3) Zakona o nezavisnim i nadzornim tijelima policijske strukture BiH („Službeni glasnik BiH“, broj 36/08), Parlamentarna skupština BiH (Predstavnički dom na 16. sjednici, održanoj 3. 2. 2021, i Dom naroda na 15. sjednici, održanoj 10. 2. 2021), imenovala je novi saziv Nezavisnog odbora na mandat od četiri godine, i to:

1. Enes Obralića, predsjednik Nezavisnog odbora,
2. Miše Ćavar, prvi zamjenik predsjednika Nezavisnog odbora,
3. Uroš Pena, drugi zamjenik predsjednika Nezavisnog odbora,
4. Muhamed Mujakić, član Nezavisnog odbora,
5. Enes Bezdob, član Nezavisnog odbora,
6. Mate Miletić, član Nezavisnog odbora,
7. Nikola Džambas, član Nezavisnog odbora,
8. Darko Kremenović, član Nezavisnog odbora, i

9. Milan Stanić, član Nezavisnog odbora.

POGLAVLJE II. NADLEŽNOSTI NEZAVISNOG ODBORA

Nezavisni odbor je, u skladu sa Zakonom o nezavisnim i nadzornim tijelima policijske strukture BiH i Poslovníkom o radu Nezavisnog odbora, nadležan za provođenje procesa odabira kandidata i predlaganje smjenjivanja policijskih rukovodilaca i zamjenika rukovodilaca policijskih tijela BiH; objavljivanje javnih konkursa i razmatranje prijave kandidata, vršenje odabira i dostavljanje ministru sigurnosti BiH, odnosno Vijeću ministara BiH, imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH, predlaganje smjenjivanja rukovodilaca i zamjenika rukovodilaca policijskih tijela BiH, ako su počinili krivično djelo, osim za krivična djela iz oblasti sigurnosti saobraćaja, ili ako počine tešku povredu službene dužnosti, kao i u slučaju ako utvrdi da ne postižu odgovarajuće rezultate, razmatranje pritužbi na rad rukovodilaca i zamjenika rukovodilaca policijskih tijela BiH i obavještanje o tome ministra sigurnosti BiH i Vijeće ministara BiH, iniciranje pokretanja disciplinskog postupka protiv rukovodilaca i zamjenika rukovodilaca policijskih tijela BiH, obradu podataka i vođenje evidencije u skladu sa zakonom i drugim propisima i ostale poslove propisane zakonom, Poslovníkom o radu i drugim propisima.

POGLAVLJE III. IZVRŠAVANJE ZADATAKA IZ NADLEŽNOSTI NEZAVISNOG ODBORA

Osnovna nadležnost Nezavisnog odbora je provođenje procesa odabira kandidata za rukovodioce i zamjenike rukovodilaca policijskih tijela BiH, te u vezi s tim objavljivanje javnih konkursa i razmatranje prijave kandidata, vršenje odabira i dostavljanje ministru sigurnosti BiH, odnosno Vijeću ministara BiH, imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH.

U vezi s navedenim, Nezavisni odbor je u 2023. godini proveo i u okvirima svoje nadležnosti okončao proceduru odabira kandidata za izbor direktora i zamjenika direktora policijskih tijela Bosne i Hercegovine, i to za: direktora Direkcije za koordinaciju policijskih tijela Bosne i Hercegovine (jedan izvršilac) i zamjenika direktora Granične policije Bosne i Hercegovine (jedan izvršilac).

Nezavisni odbor je u toku 2023. godine redovno održavao komunikaciju s rukovodiocima policijskih agencija po svim bitnim pitanjima iz njihovog djelokruga, s posebnim naglaskom na aktivnosti koje su policijska tijela preduzimala u vezi s događanjima koja su izazivala veću medijsku pažnju.

Osim ove nadležnosti, Nezavisni odbor nadležan je i za predlaganje smjenjivanja rukovodilaca i zamjenika rukovodilaca policijskih tijela BiH, te iniciranje pokretanja disciplinskih postupaka protiv rukovodilaca policijskih agencija BiH.

Odjeljak A. Realizacija zadataka održavanjem redovnih sjednica Nezavisnog odbora

U izvještajnom periodu Nezavisni odbor održao je 13 redovnih i 1 hitnu sjednicu na kojima su razmatrane ukupno 64 tačke i sedam podtački dnevnog reda, te su donesena tri zaključka.

Broj i datum održavanja sjednice	Broj razmatranih tačaka dnevnog reda na sjednici	Broj prisutnih članova sjednicama Nezavisnog odbora	Broj članova koji nisu bili prisutni sjednicama Nezavisnog odbora	Zakazivane pa otkazivane sjednice iz objektivnih razloga
20. sjednica - 24. 1. 2023. u 17.15	3	8	1	
21. sjednica - 21. 2. 2023. u 17.15	12	9		
22. sjednica - 28. 3. 2023. u 17.15	8	9		
23. sjednica - 11. 4. 2023. u 17.15	5	8	1	
24. sjednica - 22. 5. 2023. u 10.00	2	9		
25. sjednica - 22. 5. 2023. u 17.00	1	9		
26. sjednica - 6. 6. 2023. u 17.15	7	9		
27. sjednica - 4. 7. 2023. 17.15	5	7	2	
1. hitna sjednica - 14. 7. 2023. u 15.00	2	7	2	
28. sjednica - 22. 8. 2023. u 17.15	4	9		

29. sjednica - 5. 9. 2023. u 17.15	5	9		
30. sjednica - 24. 10. 2023.	4	9		
				2. hitna sjednica (2. 11. 2023)
31. sjednica - 20. 11. 2023. u 17.15	6	9		
32. sjednica - 4. 12. 2023. u 17.15	7	9		

Nezavisni odbor je na sjednicama razmatrao pitanja iz svoje nadležnosti, od kojih izdvajamo:

Na 20. sjednici Nezavisnog odbora, održanoj 24. 1. 2023, članovi Nezavisnog odbora jednoglasno su usvojili Izvještaj o radu Nezavisnog odbora kao nezavisnog tijela policijske strukture Bosne i Hercegovine za 2022. godinu koji su, u skladu s članom 7. stav (1) Zakona o nezavisnim i nadzornim tijelima policijske strukture Bosne i Hercegovine i članom 9. Poslovnika o radu Nezavisnog odbora kao nezavisnog tijela policijske strukture BiH, prosljedili Parlamentarnoj skupštini BiH na usvajanje.

Na 21. sjednici Nezavisnog odbora, održanoj 21. 2. 2023, članovi Nezavisnog odbora primili su k znanju obavještenja Vijeća ministara BiH da su na 2. sjednici, održanoj 9. 2. 2023, razmatrali

- rang-listu uspješnih kandidata za izbor direktora i dva zamjenika direktora Direkcije za koordinaciju policijskih tijela BiH te u vezi s tim zaključili da za poziciju direktora Direkcije za koordinaciju policijskih tijela BiH **ne prihvata** imenovanje prvorangiranog kandidata (Mirsada Đelilovića), **ne prihvata** ni imenovanje ostalih kandidata s liste uspješnih kandidata (Ensada Kormana) za direktora Direkcije za koordinaciju policijskih tijela BiH, dok se na pozicije zamjenika direktora Direkcije za koordinaciju policijskih tijela BiH **imenuju** Goran Amidžić i Đuro Knežević;

- rang-listu uspješnih kandidata za izbor direktora i zamjenika direktora Granične policije BiH te u vezi s tim zaključili da za poziciju direktora Granične policije BiH **imenuje** Mirka Kuprešakovića, za poziciju zamjenika direktora Granične policije BiH **ne prihvata** imenovanje prvorangiranog kandidata (Fahrudina Halača), **ne prihvata** ni imenovanje ostalih kandidata s liste uspješnih kandidata (Amre Aljić) za zamjenika direktora Granične policije BiH;

- rang-listu uspješnih kandidata za izbor direktora i zamjenika direktora Državne agencije za istrage i zaštitu te u vezi s tim zaključili da za poziciju zamjenika direktora Državne agencije za istrage i zaštitu **imenuje** Zorana Galića.

Također, razmatrano je i primljeno k znanju Obavještenje Vijeća ministara BiH s 2. sjednice, održane 9. 2. 2023, u kojem pozivaju Nezavisni odbor da ponovo raspiše javni konkurs za provođenje procedure izbora kandidata za direktora i zamjenika direktora policijskih tijela BiH, i to:

- za poziciju direktora Direkcije za koordinaciju policijskih tijela BiH i
- za poziciju zamjenika direktora Granične policije BiH.

Primljeno je k znanju i obavještenje Ministarstva sigurnosti BiH o tome.

Na osnovu obavještenja Vijeća ministara BiH i odredbi Zakona o nezavisnim i nadzornim tijelima policijske strukture BiH članovi Nezavisnog odbora su jednoglasno usvojili Odluku o raspisivanju Javnog konkursa za provođenje procedure izbora kandidata na pozicije direktora i zamjenika direktora policijskih tijela Bosne i Hercegovine i tekst Javnog konkursa, i to za pozicije:

- direktora Direkcije za koordinaciju policijskih tijela BiH i
- zamjenika direktora Granične policije BiH.

Primljen je k znanju i Izvještaj o evaluaciji BiH u petom krugu evaluacije GRECO-a, dostavljen Nezavisnom odboru od Ministarstva sigurnosti BiH.

Dalje, razmatrane su predstavke ponesene od M. K. nakon čega je jednoglasno usvojen sljedeći

ZAKLJUČAK

Potrebno je da se navedene predstavke proslijede Tužilaštvu BiH na daljnji postupak i nadležnost.

Razmatrane su i dvije anonimne predstavke, a s obzirom na to da se u navedenim predstavkama spominje rukovodstvo Granične policije BiH, jednoglasno je usvojen sljedeći

ZAKLJUČAK

Potrebno je da se navedene predstavke proslijede direktoru Granične policije BiH na očitovanje o svim navodima iz predstavki, a radi daljnjeg postupanja Nezavisnog odbora.

Pisanu informaciju potrebno je dostaviti Nezavisnom odboru najkasnije do 28. 2. 2023.

Također, razmatrana je i predstavka I. L. nakog čega je jednoglasno konstatirano da Nezavisni odbor nije nadležan za rješavanje predstavke te da se ona stavi *ad acta*.

Na 22. sjednici Nezavisnog odbora, održanoj 28. 3. 2023, razmatrano je i primljeno k znanju očitovanje direktora Granične policije BiH u skladu sa zaključkom s 21. sjednice Nezavisnog odbora. Razmatran je dopis Ministarstva sigurnosti BiH kojim se od Nezavisnog odbora traži očitovanje na prigovor Transparency Internationala. Naglašeno je da prigovor Transparency Internationala, što je vidljivo iz njihovog dopisa, nije upućen Nezavisnom odboru, nego Ministarstvu sigurnosti BiH i Instituciji ombudsmena za ljudska prava BiH. S obzirom da članovi Nezavisnog odbora nisu imali prijedlog odgovora na uvid prije održavanja sjednice, a koji je predsjednik pripremio, zaključeno je da sekretar Nezavisnog odbora e-mailom dostavi taj prijedlog članovima, nakon čega će se usaglašavati.

Razmatran je i dopis Institucije ombudsmena za ljudska prava BiH u kojem se od Nezavisnog odbora traži izjašnjenje na navode po žalbi M. Đ, kandidata u postupku izbora i imenovanja direktora Direkcije za koordinaciju policijskih tijela BiH. S obzirom na to da članovi Nezavisnog odbora, kao i kod prethodnog dopisa, nisu imali prijedlog odgovora na uvid prije održavanja sjednice, a koji je predsjednik pripremio, zaključeno je da sekretar Nezavisnog odbora e-mailom dostavi taj prijedlog članovima, nakon čega će se usaglašavati.

Razmatrano je i primljeno k znanju obavještenje Ministarstva sigurnosti BiH u vezi sa Izvještajem o evaluaciji BiH u petom krugu evaluacije GRECO-a u kojem se pozivaju nadležne institucije BiH da preuzmu aktivnosti (iz svoje nadležnosti) u provođenju preporuka GRECO-a iz petog kruga evaluacije.

Na 23. sjednici Nezavisnog odbora, održanoj 11. 4. 2023, a u skladu s dogovorom s prošle sjednice, razmatran je i jednoglasno usvojen odgovor koji je dostavljen Ministarstvu sigurnosti BiH, a u vezi s očitovanjem na prigovor Transparency Internationala. Također, u skladu s dogovorom s prošle sjednice, razmatran je i jednoglasno usvojen odgovor koji je dostavljen Instituciji ombudsmena za ljudska prava BiH, a u vezi s očitovanjem na navode po žalbi M. Đ, kandidata u postupku izbora i imenovanja direktora Direkcije za koordinaciju policijskih tijela BiH.

Dalje, razmatrane su pristigle prijave na Javni konkurs za provođenje procedure odabira kandidata za izbor direktora i zamjenika direktora policijskih tijela Bosne i Hercegovine. Konstatirano je da je blagovremeno pristiglo 12 prijava. Nakon uvida u pristigle prijave, članovi Nezavisnog odbora konstatirali su da su se na Javni konkurs prijavili sljedeći kandidati: Almir Bašić na pozicije direktora Direkcije za koordinaciju policijskih tijela BiH i

zamjenika direktora Granične policije BiH, Ensad Korman na pozicije direktora Direkcije za koordinaciju policijskih tijela BiH i zamjenika direktora Granične policije BiH, Enes Karić na poziciju direktora Direkcije za koordinaciju policijskih tijela BiH, Edin Malkić na pozicije direktora Direkcije za koordinaciju policijskih tijela BiH i zamjenika direktora Granične policije BiH, Vahidin Munjić na pozicije direktora Direkcije za koordinaciju policijskih tijela BiH i zamjenika direktora Granične policije BiH, Mustafa Selmanović na pozicije direktora Direkcije za koordinaciju policijskih tijela BiH i zamjenika direktora Granične policije BiH, Halid Emkić na pozicije direktora Direkcije za koordinaciju policijskih tijela BiH i zamjenika direktora Granične policije BiH, Mirsad Đelilović na poziciju direktora Direkcije za koordinaciju policijskih tijela BiH, Amra Aljić na pozicije direktora Direkcije za koordinaciju policijskih tijela BiH i zamjenika direktora Granične policije BiH, Damir Muhedinović na pozicije direktora Direkcije za koordinaciju policijskih tijela BiH i zamjenika direktora Granične policije BiH, Merzuk Salkić na pozicije direktora Direkcije za koordinaciju policijskih tijela BiH i zamjenika direktora Granične policije BiH i Fahrudin Halač na pozicije direktora Direkcije za koordinaciju policijskih tijela BiH i zamjenika direktora Granične policije BiH. Sve prijave su blagovremene, potpune i prihvaćene u konkursnoj proceduri.

Dogovoreno je da se po službenoj dužnosti dopisom zatraži od nadležnih ministarstava unutrašnjih poslova dokaz o neosuđivanju, nakon čega će kandidati biti pozvani na intervju.

Razmatrana je i predstavka A. Š, nakon čega je jednoglasno usvojen sljedeći

ZAKLJUČAK

Nezavisni odbor nije nadležan za postupanje po ovoj predstavi te će je, shodno odredbi iz člana 58. Zakona o upravnom postupku Bosne i Hercegovine, proslijediti Nezavisnom odboru Skupštine Kantona Sarajevo na nadležnost i postupanje, o čemu će podnosilac predstavke biti obaviješten.

Na 24. sjednici Nezavisnog odbora, održanoj 22. 5. 2023, obavljen je intervju s kandidatima koji su se prijavili i koji ispunjavaju uslove Javnog konkursa za provođenje procedure odabira kandidata za izbor direktora i zamjenika direktora policijskih tijela Bosne i Hercegovine. Na intervju je, u skladu s članom 13. stav (1) Poslovnika o radu Nezavisnog odbora kao nezavisnog tijela policijske strukture BiH, pozvano 12 kandidata koji su se prijavili i koji ispunjavaju uslove Javnog konkursa za provođenje procedure odabira kandidata za izbor direktora i zamjenika direktora policijskih tijela Bosne i Hercegovine:

Amra Aljić, Almir Bašić, Mirsad Đelilović, Halid Emkić, Fahrudin Halač, Enes Karić, Ensad Korman, Edin Malkić, Damir Muhedinović, Vahidin Munjić, Merzuk Salkić i Mustafa Selmanović.

Intervjuu se odazvalo osam kandidata, dok su četiri kandidata odustala (Mirsad Đelilović, Halid Emkić, Fahrudin Halač i Merzuk Salkić).

Na 25. sjednici Nezavisnog odbora, održanoj 22. 5. 2023., članovi Nezavisnog odbora utvrdili su konačnu rang-listu uspješnih kandidata prijavljenih na Javni konkurs za provođenje procedure odabira kandidata za izbor direktora i zamjenika direktora policijskih tijela Bosne i Hercegovine koja je, u skladu s članom 13. stav (2) Poslovnika o radu Nezavisnog odbora kao nezavisnog tijela policijske strukture BiH, dostavljena ministru sigurnosti BiH na daljnje postupanje.

R A N G - L I S T A

uspješnih kandidata

I. Za poziciju direktora Direkcije za koordinaciju policijskih tijela Bosne i Hercegovine

1. Enes Karić (78,75 bodova)
2. Ensad Korman (68,75 bodova)
3. Mustafa Selmanović (60,00 bodova)

II. Za poziciju zamjenika direktora Granične policije Bosne i Hercegovine

1. Ensad Korman (78,75 bodova)
2. Mustafa Selmanović (67,50 bodova)
3. Edin Malkić (60,37 bodova)

Na 26. sjednici Nezavisnog odbora, održanoj 6. 6. 2023., predsjednik Nezavisnog odbora upoznao je članove Nezavisnog odbora da je 24. 5. 2023. proslijedio rang-listu uspješnih kandidata za izbor direktora Direkcije za koordinaciju policijskih tijela Bosne i Hercegovine i zamjenika direktora Granične policije Bosne i Hercegovine Ministarstvu sigurnosti BiH. Također, istakao je da je isti dan uputio i dopis Ministarstvu sigurnosti BiH da Nezavisni odbor obavijesti da li je rang-listu dostavio Vijeću ministara BiH, jer je odredbama člana 13. stav (3) Poslovnika o radu Nezavisnog odbora kao nezavisnog tijela policijske strukture Bosne i Hercegovine propisano da ako ministar sigurnosti BiH ne dostavi svoj prijedlog i rang-listu uspješnih kandidata Vijeću ministara BiH u roku od deset dana, Nezavisni odbor će u roku od pet dana rang-listu uspješnih kandidata neposredno dostaviti Vijeću ministara BiH na odlučivanje i izbor kandidata.

Razmatrana je i predstavka I. L, nakog čega je jednoglasno konstatirano da Nezavisni odbor nije nadležan za rješavanje predstavke te da se ona stavi *ad acta*.

Dalje, Miše Ćavar, prvi zamjenik predsjednika Nezavisnog odbora, i Muhamed Mujakić, član Nezavisnog odbora, informirali su prisutne članove Nezavisnog odbora o aktivnostima podnošenja aplikacije za studijsku posjetu članova Nezavisnog odbora nekoj od zemalja Evropske unije i posjetu njihovom nezavisnom odboru putem programa TAIX.

Na 27. sjednicu Nezavisnog odbora, održanu 4. 7. 2023, pozvani su Darko Ćulum, direktor Državne agencije za istrage i zaštitu, i Zoran Galić, zamjenik direktora Državne agencije za istrage i zaštitu, kako bi s članovima Nezavisnog odbora razgovarali o trenutnom stanju u Državnoj agenciji za istrage i zaštitu, o realiziranim aktivnostima, kao i o aktivnostima koje su planirane za naredni period. Razgovarali su o trenutnom stanju u Državnoj agenciji za istrage i zaštitu, rezultatima koje su ostvarili u prethodnom periodu, a posebno kada je u pitanju organizirani kriminal, borba protiv terorizma, trgovina ljudima i narkoticima, problemima s kojima se susreću u radu, kadrovskoj popunjenosti i prijemu novih policijskih službenika, nacionalnoj strukturi zaposlenih (a koja se zasniva na popisu stanovništva iz 1991), o Zakonu o policijskim službenicima, o Zakonu o Državnoj agenciji za istrage i zaštitu, saradnji s Tužilaštvom BiH kao i tužilaštvima na ostalim nivoima u Bosni i Hercegovini, saradnji s drugim policijskim agencijama u Bosni i Hercegovini te međuljudskim odnosima u Agenciji.

Razmatrano je i jednoglasno primljeno k znanju obavještenje Ministarstva sigurnosti BiH da su svoj prijedlog i rang-listu uspješnih kandidata za izbor direktora Direkcije za koordinaciju policijskih tijela BiH i zamjenika direktora Granične policije BiH dostavili Vijeću ministara BiH na odlučivanje i izbor. Razmatrana je i predstavka I. L, nakog čega je jednoglasno konstatirano da Nezavisni odbor nije nadležan za rješavanje predstavke te da se ona stavi *ad acta*.

Dalje, prvi zamjenik predsjednika Nezavisnog odbora Miše Ćavar informirao je prisutne članove Nezavisnog odbora o učešću na ekspertskoj radionici u okviru Projekta „Bosna i Hercegovina gradi inkluzivni nadzor nad sigurnošću – BIHOS koju je organizirao Centar za sigurnosne studije, u saradnji s Centrom za evropske sigurnosne studije (Groningen, Kraljevina Nizozemska). Radionica je održana 20. 6. 2023. u zgradi Parlamentarne skupštine BiH.

Na 1. hitnoj sjednici Nezavisnog odbora, održanoj 14. 7. 2023, jednoglasno je utvrđen tekst izjašnjenja na dopis Pravobranilaštva BiH u kojem se od Nezavisnog odbora traži

izjašnjenje na navode po tužbi M. Đ, kandidata u postupku izbora i imenovanja direktora Direkcije za koordinaciju policijskih tijela BiH koje je Nezavisni odbor proveo u 2022. godini.

Na 28. sjednicu Nezavisnog odbora, održanu 22. 8. 2023, pozvani su Mirko Kuprešaković, direktor Granične policije BiH, i Ensad Korman, zamjenik direktora Granične policije BiH kako bi s članovima Nezavisnog odbora razgovarali o trenutnom stanju u Graničnoj policiji BiH, realiziranim aktivnostima, kao i o aktivnostima koje su planirane za naredni period. Razgovarali su o trenutnom stanju u Graničnoj policiji BiH, aktivnostima koje su provodili i koje imaju namjeru provoditi u narednom periodu, a u svrhu unapređenja rada Granične policije BiH. Direktor je istakao da je najveći problem to što Granična policija BiH trenutno ima najmanje policijskih službenika od svog osnivanja. Naime, trenutno u Graničnoj policiji nedostaje 595 policijskih službenika, a u toku 2024. godine 347 policijskih službenika ispunit će uslove za penziju. To znači da će zaključno s 31. 12. 2024. godine u Graničnoj policiji BiH nedostajati oko 900 policijskih službenika. Trenutno je u fazi okončanja jedan konkurs za 150 policijskih službenika te će nakon njihovog odlaska na akademiju biti raspisan novi za dodatnih 150 policijskih službenika čime bi se barem malo nadomjestio nedostatak. Dalje, razgovarali su o izradi novog pravilnika o unutrašnjoj organizaciji i sistematizaciji radnih mjesta jer je sadašnji donesen prije 15 godina i neophodno ga je promijeniti. Razgovarali su o stanju na graničnim prijelazima, nabavci nove opreme na graničnim prijelazima, o novom pravilniku o uniformama, unapređenjima unutar Granične policije BiH, a kojih nije bilo nekoliko godina, kao i o nacionalnoj strukturi zaposlenih za koju je direktor istakao da je u Pravilniku o unutrašnjoj organizaciji i sistematizaciji radnih mjesta za sva radna mjesta u Graničnoj policiji BiH utvrđen nacionalni balans shodno popisu stanovništva iz 1991. godine. Također, razgovarano je o migrantskoj krizi te kao odgovor na nju, a u svrhu kontrole i nadzora granične linije, potpisan je sporazum o saradnji s policijskim agencijama na nivou BiH, sporazum o saradnji sa susjednim državama te okvirni sporazum sa Službom za poslove sa strancima. Na upit člana Nezavisnog odbora Muhameda Mujakića da li je u budućem periodu planirana nabavka dronova kao jedan vid zaštite granične linije, a pogotovo njenog zelenog dijela, i da li su u novom Pravilniku o unutrašnjoj organizaciji i sistematizaciji radnih mjesta predvidjeli prijem mlađih policijskih službenika ili operatera koji bi njima upravljali, direktor je istakao da je planirana nabavka 10-ak dronova koja automatski prati specijalističku obuku policijskih službenika koji bi njima upravljali. Također, članovi Nezavisnog odbora su rukovodstvu Granične policije BiH sugerirali da se izvrše dodatni

napori u saradnji s Upravom za indirektno oporezivanje, a u čijoj je nadležnosti održavanje graničnih prijelaza, da se pojedini granični prijelazi dovedu u neko pristojno stanje koje bi trebalo biti na ulazu u BiH.

Razmatrane su i predstavka I. L. i molba M. L. nakog čega je jednoglasno konstatirano da Nezavisni odbor nije nadležan za njihovo rješavanje te da se stave *ad acta*.

Na 29. sjednicu Nezavisnog odbora, održanu 5. 9. 2023, pozvani su Enes Karić, direktor Direkcije za koordinaciju policijskih tijela BiH, te Đuro Knežević i Goran Amidžić, zamjenici direktora Direkcije za koordinaciju policijskih tijela BiH kako bi s članovima Nezavisnog odbora razgovarali o trenutnom stanju u Direkciji za koordinaciju policijskih tijela BiH, realiziranim aktivnostima, kao i o aktivnostima planiranim za naredni period.

Razgovarali su o trenutnom stanju u Direkciji za koordinaciju policijskih tijela BiH, aktivnostima koje su provodili i koje imaju namjeru provoditi u narednom periodu, kadrovskoj popunjenosti, unapređenju, odnosno činovanju policijskih službenika, o izradi novog pravilnika o unutrašnjoj organizaciji i sistematizaciji radnih mjesta, izmjeni Odluke o osobama i objektima koji se štite, o novom Zakonu o policijskim službenicima BiH koji bi predviđao eksterni premještaj policijskih službenika unutar policijskih agencija na nivou BiH, o problemu trajnog smještaja Direkcije za koordinaciju policijskih tijela BiH, o edukacijama i obukama koje prolaze policijski službenici, saradnji s EUROPOL-om, saradnji s drugim policijskim agencijama u BiH, saradnji sa Službom za poslove sa strancima kojima trenutno na osnovu potpisanog Sporazuma pomažu s određenim brojem policijskih službenika u osiguranju četiri migrantska kampa.

Na upit člana Nezavisnog odbora Muhameda Mujakića, a u vezi s nacionalnom strukturom zaposlenih u Direkciji za koordinaciju policijskih tijela BiH, da li se vodi računa o tome prilikom zapošljavanja, kako policijskih službenika tako i mlađih inspektora, viših inspektora, inspektora, samostalnih inspektora, glavnih inspektora, da tu ne dođe do nekog disbalansa, direktor je iznio sljedeće podatke.

Na dan 5. 9. 2023, u skladu s popisom stanovništva iz 1991, u Direkciji za koordinaciju policijskih tijela BiH je:

- ukupno zaposlenih 885: Bošnjaka 466 (53,25%), Hrvata 142 (16,22%), Srba 260 (29,71%), ostalih 7 (0,8%)

- policijski službenici - ukupno: Bošnjaka 424, Hrvata 130, Srba 220, ostalih 4

- glavni inspektor: Bošnjaka 3, Hrvata 0, Srba 4, ostalih 0

- samostalni inspektor: Bošnjaka 10, Hrvata 4, Srba 7, ostalih 0

- viši inspektor: Bošnjaka 7, Hrvata 2, Srba 4, ostalih 0

- inspektor: Bošnjaka 14, Hrvata 5, Srba 9, ostalih 1

- mlađi inspektor: Bošnjaka 1, Hrvata 1, Srba 0, ostalih 0

- stariji narednik: Bošnjaka 17, Hrvata 5, Srba 2, ostalih 0

- narednik: Bošnjaka 19, Hrvata 6, Srba 12, ostalih 0

- stariji policajac: Bošnjaka 138, Hrvata 29, Srba 72, ostalih 1

- policajac: Bošnjaka 214, Hrvata 77, Srba 109, ostalih 3

Također, Muhamed Mujakić, član Nezavisnog odbora, iznio je konstataciju, odnosno ideju, kada je u pitanju školovanje kadrova na nivou BiH, da se možda, ako je kapacitet ograničen, a što je kao problem prethodno istakao direktor, razmisli o partnerstvu s entitetskim policijskim akademijama, da se možda jedna klasa jedne agencije dodijeli drugoj entitetskoj akademiji. Dao je i punu podršku direktoru po pitanju eksternog premještaja policijskih službenika unutar policijskih agencija na nivou BiH kada se za tim ukaže potreba.

Na 30. sjednici Nezavisnog odbora, održanoj 24. 10. 2023, razmatran je dopis Pravobranilaštva BiH u kojem se od Nezavisnog odbora traži izjašnjenje na navode po tužbi F. H, kandidata u postupku izbora i imenovanja zamjenika direktora Granične policije BiH koje je Nezavisni odbor proveo u 2022. godini. S obzirom na to da je izjašnjenje bilo potrebno dostaviti u roku od dva dana od prijema dopisa, članovi Nezavisnog odbora su cirkularno putem e-maila jednoglasno utvrdili izjašnjenje koje je putem pošte, ali i e-mailom proslijeđeno Pravobranilaštvu BiH. Članovi Nezavisnog odbora na ovoj sjednici jednoglasno su verificirali predmetno izjašnjenje.

Dalje, članovi Nezavisnog odbora jednoglasno su dogovorili da će, u skladu s Planom rada Nezavisnog odbora kao nezavisnog tijela policijske strukture BiH za 2023. godinu, a u prethodno dogovorenim timovima, u mjesecu novembru 2023. posjetiti Državnu agenciju za istrage i zaštitu te Graničnu policiju BiH, a u mjesecu decembru 2023. Direkciju za koordinaciju policijskih tijela BiH. Muhamed Mujakić, član Nezavisnog odbora, informirao je članove Nezavisnog odbora o realizaciji studijske posjete članova Nezavisnog odbora Republici Irskoj putem programa TAIEX.

Na 31. sjednici Nezavisnog odbora, održanoj 20. 11. 2023, jednoglasno je usvojen Izvještaj o posjeti članova Nezavisnog odbora Graničnoj policiji BiH koja je upriličena 14. 11. 2023, a u kojoj su bili: Miše Ćavar, prvi zamjenik predsjednika Nezavisnog odbora, i Enes Bezdrob, član Nezavisnog odbora. Razmatrana je Informacija o posjeti članova Nezavisnog odbora

Državnoj agenciji za istrage i zaštitu koja je upriličena 16. 11. 2023, a u kojoj su bili: Uroš Pena, drugi zamjenik predsjednika Nezavisnog odbora, Nikola Džambas i Muhamed Mujakić, članovi Nezavisnog odbora.

Razmatrana je i predstavka A. S. nakog čega je jednoglasno konstatirano da Nezavisni odbor nije nadležan za rješavanje predstavke te da se ona stavi *ad acta*.

Na 32. sjednici Nezavisnog odbora, održanoj 4. 12. 2023, članovi Nezavisnog odbora jednoglasno su usvojili Plan rada Nezavisnog odbora kao nezavisnog tijela policijske strukture Bosne i Hercegovine za 2024. godinu. Jednoglasno je usvojen Izvještaj o posjeti članova Nezavisnog odbora Državnoj agenciji za istrage i zaštitu koja je upriličena 16. 11. 2023. Razmatrana je Informacija o posjeti članova Nezavisnog odbora Direkciji za koordinaciju policijskih tijela BiH koja je upriličena 4. 12. 2023, a u kojoj su bili: Enes Obralija, predsjednik Nezavisnog odbora, Mate Miletić i Milan Stanić, članovi Nezavisnog odbora. Razmatran je i dopis Ministarstva sigurnosti BiH, a u vezi sa Izvještajem o evaluaciji Bosne i Hercegovine u petom krugu evaluacije GRECO. Također, razmatrana je i predstavka I. L. nakog čega je jednoglasno konstatirano da Nezavisni odbor nije nadležan za rješavanje predstavke te da se ona stavi *ad acta*.

Odjeljak B. Realizacija zadataka održavanjem sastanaka s rukovodiocima policijskih tijela BiH u skladu s Planom rada za 2023. godinu

Planom rada Nezavisnog odbora za 2023. godinu predviđeno je održavanje pojedinačnih sastanaka s rukovodstvom Direkcije za koordinaciju policijskih tijela BiH, Državne agencije za istrage i zaštitu i Granične policije BiH. Cilj ovih sastanaka je uvid u rad i upoznavanje s problemima s kojima se u radu susreću rukovodioci policijskih agencija BiH. Nezavisni odbor obavlja zadatke iz svoje nadležnosti i putem izvještaja o radu koji dostavlja Parlamentarnoj skupštini BiH na razmatranje i usvajanje informira je o problemima u radu policijskih agencija BiH iz svoje nadležnosti.

Nezavisni odbor je u 2023. godini, u skladu s članom 18. Poslovnika o radu Nezavisnog odbora i Planom rada Nezavisnog odbora za 2023. godinu, obavio posjete:

Posjete	Datum posjete
Graničnoj policiji BiH	14. 11. 2023.

Državnoj agenciji za istrage i zaštitu	16. 11. 2023.
Direkciji za koordinaciju policijskih tijela BiH	4. 12. 2023.

1. Graničnoj policiji BiH, 14. 11. 2023.

Sastanak članova Nezavisnog odbora kao nezavisnog tijela policijske strukture BiH s direktorom Granične policije BiH Mirkom Kuprešaković, zamjenikom direktora Granične policije Ensadom Kormanom i pomoćnikom direktora za organizaciju i operacije Draganom Kulićem održan je 14. 11. 2023. u prostorijama Granične policije BiH. U ime Nezavisnog odbora sastanku su prisustvovali: Miše Ćavar, prvi zamjenik predsjednika Nezavisnog odbora, Enes Bezdob, član Nezavisnog odbora, te Ivana Lovrić, sekretarka Nezavisnog odbora.

U uvodu u razgovor direktor je istakao da rukovodstvo Granične policije BiH ima osnovne strateške pravce i ciljeve kojima idu i kojih se pridržavaju. Jedan od bitnih ciljeva Granične policije BiH je smanjenje kadrovske deficita. Naime, od 2019. godine u Graničnoj policiji BiH nije bilo konkursa za prijem policijskih službenika, ali ni unapređenja u Graničnoj policiji BiH. Istakao je da na dan 13. 11. 2023. u Graničnoj policiji BiH nedostaje 629 policijskih službenika, a u toku 2024. godine oko 300 policijskih službenika ispunit će uslove za penziju. To znači da će zaključno s 31. 12. 2024. u Graničnoj policiji BiH nedostajati oko 900 policijskih službenika. Trenutno je u fazi okončanja jedan konkurs za 150 policijskih službenika te će nakon njihovog odlaska na akademiju biti raspisan novi za dodatnih 150 policijskih službenika čime bi se barem malo nadomjestio nedostatak. Plan je da se svakih osam mjeseci, koliko traje školovanje kadeta, primi novih 150 policijskih službenika. Ono što je bitno naglasiti je da je jedan policijski službenik u potpunosti operativan tek nakon dvije godine, jer mora proći konkurs, akademiju te pripravnički staž. Direktor je istakao da je jedna od mogućnosti da se smanji broj nedostajućih policijskih službenika izmjena Zakona o policijskim službenicima BiH gdje bi se predvidjela mogućnost da policijskom službeniku koji je ispunio jedan od uslova za odlazak u penziju direktor omogući produženje radnog vijeka na određeni period uz ljekarski pregled.

Drugi veoma bitan segment je sigurnost granice, a koja nije u potpunosti moguća s ovakvim kadrovskim deficitom. Istakao je da najveću prijetnju sigurnosti granice predstavlja migrantska kriza. U proteklom periodu imali su saznanja da su određeni migranti naoružani te

su pojačali aktivnosti pregleda migranata, pretreseno je preko 1000 migranata. Pojačane su aktivnosti u tri zone: I. zona - Šengen, II. zona – prema Srbiji i III. zona prema Crnoj Gori. Posljednja takva pojačana aktivnost bila je u Zvorniku i od tada nijedan migrant iz pravca Srbije nije ušao u Bosnu i Hercegovinu.

U svrhu kontrole i nadzora granične linije, rukovodstvo Granične policije BiH istaklo je da su potpisani sporazum o saradnji s policijskim agencijama na nivou BiH, s entitetskim i kantonalnim policijskim agencijama, sporazum o saradnji sa susjednim državama te Okvirni sporazum sa Službom za poslove sa strancima BiH. Naglasili su da se u saradnji s Ministarstvom unutrašnjih poslova Unsko-sanskog kantona ulažu svi naponi kako bi se osposobio granični prijelaz Hadžin Potok.

Na upit prvog zamjenika Nezavisnog odbora Miše Čavara o sve učestalijim medijskim napisima po pitanju FRONTEXA (Agencija za evropsku graničnu i obalnu stražu) direktor je istakao da je na njegov prijedlog i pokrenuta inicijativa za potpisivanje sporazuma, ali je sve još u proceduri. Na njegovom čelu bio bi direktor Granične policije BiH. Istakao je da bi potpisivanje sporazuma s FRONTEX-om BiH donijelo višemilionsku korist, jer pored pomoći u ljudstvu, oni donose svoju tehničku opremu i vozila.

Na pitanje člana Nezavisnog odbora Enesa Bezdroba da li su zadovoljni raspodjelom sredstava u budžetu BiH i kako stoje s materijalno-tehničkim sredstvima, direktor je istakao da budžet jeste veliki, ali najviše sredstava ide na plaće zaposlenih u Graničnoj policiji BiH. S obzirom na nedavno usvojeni Pravilnik o izgledu policijske uniforme, u narednom periodu će im trebati velika finansijska sredstva za promjenu uniformi policijskih službenika.

Dalje, istakao je da, iako je infrastruktura graničnih prijelaza u nadležnosti Uprave za indirektno oporezivanje, ulažu sve napore da svojim, ali i donatorskim sredstvima poboljšaju uslove za rad svojih zaposlenih na graničnim prijelazima.

Rukovodstvo Granične policije BiH istaklo je da je završen novi Pravilnik o unutrašnjoj organizaciji i sistematizaciji radnih mjesta u Graničnoj policiji BiH koji je usvojen 2004. godine, sa izmjenom 2013, a koji je bilo neophodno mijenjati. Trenutno se čeka mišljenje Ureda za zakonodavstvo i Ministarstva finansija i trezora BiH na Pravilnik nakon čega bi išao Vijeću ministara BiH na usvajanje.

Na kraju su članovi Nezavisnog odbora naglasili da će idalje, u okviru svojih nadležnosti, pružati podršku radu Granične policije BiH i poželjeli im mnogo uspjeha.

2. Državnoj agenciji za istrage i zaštitu, 16. 11. 2023.

Sastanak članova Nezavisnog odbora kao nezavisnog tijela policijske strukture BiH s direktorom Državne agencije za istrage i zaštitu Darkom Čulumom i zamjenikom direktora Državne agencije za istrage i zaštitu Zoranom Galićem održan je 16. 11. 2023. u prostorijama Državne agencije za istrage i zaštitu. U ime Nezavisnog odbora sastanku su prisustvovali: Uroš Pena, drugi zamjenik predsjednika Nezavisnog odbora, Nikola Džambas i Muhamed Mujakić, članovi Nezavisnog odbora, te Ivana Lovrić, sekretarka Nezavisnog odbora.

Direktor Državne agencije za istrage i zaštitu Darko Čulum na početku je ukratko upoznao članove Nezavisnog odbora o realiziranim aktivnostima, aktivnostima koje su planirane za naredni period, kao i o problemima s kojima se susreću u radu.

Govorio je o aktivnostima koje imaju zajedno s policijskim agencijama unutar BiH i policijskim agencijama izvan BiH, o krivičnim djelima po kojima postupaju, o pojedinim akcijama, čak i njihovim operativnim radnjama. Istakli su da je saradnja s policijskim agencijama unutar BiH izuzetno dobra. Međutim, problem je saradnja s Tužilaštvom kao naredbodavcem. Problem je u tome što im sve više naredbi pristiže od okružnih i kantonalnih tužilaštava, na šta su članovi Nezavisnog odbora u prethodnim razgovorima s rukovodstvom ukazivali kao problem iako je u Zakonu o krivičnom postupku predviđeno koje su to policijske agencije kojima se može izdati naredba.

Prezentirana je popunjenost odnosno djelimična popunjenost Državne agencije za istrage i zaštitu, ali to ne predstavlja problem u njihovom postupanju.

Bez obzira na dobru saradnju s policijskim agencijama unutar BiH, direktor i zamjenik iskazali su zabrinutost zbog neprikupljanja potrebnih obavještenja o krivičnim djelima na prostoru BiH, a to znači da saznaju za krivična djela po raznim drugim aktivnostima drugih institucija odnosno policijskih agencija izvan BiH (aplikacije ANUM i SKY). Istakli su da i ne znaju za pojedina krivična djela, a ogroman ih je broj.

Obavijestili su ovo tijelo da se radi na izmjenama i dopunama Pravilnika o unutrašnjoj organizaciji i sistematizaciji radnih mjesta kojim predviđaju formiranje novog Odjela za terorizam. Također, predviđeno je da svi rukovodioci budu samostalni inspektori. Važećim Pravilnikom o unutrašnjoj organizaciji i sistematizaciji radnih mjesta predviđeno je 955

zaposlenih, a trenutno ih je 737. Naglasili su i da je neophodno mijenjati Pravilnik o unapređenju.

Razgovarano je o opremanju i edukaciji policijskih službenika. Istaknuto je da su obuke koje se pohađaju kratke, a da osobe koje drže obuke ni same nisu educirane.

Što se tiče smještaja za specijalnu jedinicu, direktor je istakao da je Državna agencija za istrage i zaštitu osigurala sredstva za tu namjenu u iznosu od 8 mil. KM. Osigurana je lokacija, plaćena je dozvola za izgradnju i planira se ići u proceduru. Za početak je planirana izgradnja infrastrukture, a izgradnja cijele zgrade koštala bi oko 15 mil. KM. Smještaj Državne agencije za istrage i zaštitu u Banjoj Luci je, također, u fazi rješavanja. Izdat je javni poziv za kupovinu zgrade. Smještaj prikrivenih istražitelja još nije riješen.

Na upit članova Nezavisnog odbora kakva je saradnja s Europolom i kontakt-tačkom za koju svi znamo da je u Ministarstvu sigurnosti BiH, direktor je istakao da je zadovoljan saradnjom i da su uvijek dvije osobe iz Državne agencije za istrage i zaštitu na raspolaganju za saradnju.

Na upit člana Nezavisnog odbora Muhameda Mujakića kakva je nacionalna struktura glavnih inspektora, samostalnih inspektora i ostalih policijskih službenika, kao i državnih službenika u Državnoj agenciji za istrage i zaštitu, direktor je istakao da kada je u pitanju nacionalna struktura državnih službenika, pretežno su službenici srpske nacionalnosti. Prema popisu iz 1991. godine, nedostaje određeni broj Bošnjaka. Što se tiče policijskih službenika, direktor je istakao da je tu statistika izbalansirana. Dalje, u vezi s popunjavanjem mjesta glavnog inspektora specijalne policijske jedinice, koju je prije odlaska na drugu poziciju obavljao Enes Karić (Bošnjak), član Nezavisnog odbora Muhamed Mujakić pitao je zašto je to mjesto glavnog inspektora popunjeno iz drugog naroda. Direktor je detaljno objasnio strukturu glavnih inspektora, te rekao da se vodi računa o nacionalnoj zastupljenosti svih konstitutivnih naroda u BiH.

Članovi Nezavisnog odbora dali su punu podršku radu Državne agencije za istrage i zaštitu, posebno u predmetima organiziranog kriminala i predmetima aplikacija SKY i ANUM.

Članovi Nezavisnog odbora na kraju su naglasili da će Nezavisni odbor, u okviru svojih nadležnosti, nastaviti pružati podršku radu Državne agencije za istrage i zaštitu, te poželjeli mnogo uspjeha u daljnjem radu ove agencije.

3. Direkciji za koordinaciju policijskih tijela BiH, 4. 12. 2023.

Sastanak članova Nezavisnog odbora kao nezavisnog tijela policijske strukture BiH s direktorom Direkcije za koordinaciju policijskih tijela BiH Enesom Karićem, zamjenicima direktora Direkcije za koordinaciju policijskih tijela BiH Đurom Kneževićem i Goranom Amidžićem održan je 4. 12. 2023. u prostorijama Direkcije za koordinaciju policijskih tijela BiH. U ime Nezavisnog odbora sastanku su prisustvovali: Enes Obralića, predsjednik Nezavisnog odbora, Mate Miletić i Milan Stanić, članovi Nezavisnog odbora.

Direktor Direkcije za koordinaciju policijskih tijela BiH (u daljnjem tekstu: Direkcija) na početku sastanka upoznao je članove Nezavisnog odbora o značajnim aktivnostima koje su imali u proteklom periodu, kao i o problemima s kojima se susreću u radu.

Istakao je da imaju određenih problema sa smještajem, odnosno s JU „Studentski centar“ u čijoj zgradi su pod zakupom. Naime, Direkcija kao i Agencija za policijsku podršku, koja je također tu smještena, nisu riješili svoje stambeno pitanje. Zgrada je vlasništvo Kantona Sarajevo koja je data JU „Studentski centar“ na korištenje i upravljanje, ali je ona dosta oronula, uništena i ne zadovoljava potrebe Direkcije. Posebno je istakao problem u Jedinici za intervencije i podršku koja broji ukupno 35 policijskih službenika (4 žene i 31 muškarac), a ima samo jednu tuš-kabinu na 34 muškarca. Istakao je da Direkcija ima dobru saradnju s JU „Studentski centar“, ali je problem što su oni u velikim finansijskim problemima. To se odražava i na ugostiteljski sektor JU „Studentski centar“, koji je donedavno pružao svoje restoranske usluge i Direkciji, ali je nažalost zatvoren. Ostale su samo usluge bifea (kafa i čaj). U kontinuitetu se održavaju sastanci s JU „Studentski centar“ kako bi se iznalazila najbolja rješenja. Tome najbolje svjedoči podatak da Direkcija ima ugovor na 4.300 m² kancelarijske površine, a zapravo koriste oko 5.000 m². Istakao je i da su imali jednu poplavu u magacinu u julu 2023, ali nije bilo velike materijalne štete jer je roba uglavnom bila u folijama. Direktor je istakao da je na početku svog mandata formirao jednu ad hoc komisiju koja je imala zadatak da popiše municiju, hemijska sredstva, sredstva za veze i komunikacije i vozila, a sve kako bi se uvjerio u stvarno stanje MTS-a kojim Direkcija raspolaže.

Direktor je, također, istakao da bi u narednom periodu trebalo obilježiti parking-mjesta koja koristi Direkcija te riješiti ulazak i izlazak iz kruga Direkcije.

Pokrenuli su ponovo pitanje trajnog smještaja Direkcije. Ne nazire se još rješenje, ali su tri moguća scenarija: prvi je kupovina zemljišta i izgradnja objekta iz temelja, drugi je

pronalazak novog objekta za kupovinu, a treći je etažiranje sadašnjeg objekta u kojem se nalaze i da se tu trajno smjeste.

Direktor je istakao da veliki problem predstavlja nedostatak policijskih službenika. Trenutna popunjenost u Direkciji iznosi 68%, a očekuju da će u toku 2024. godine u penziju otići još 67 policijskih službenika, što će iznositi 61%. Uputili su prijedlog o izmjenama i dopunama Pravilnika o unutrašnjoj organizaciji i sistematizaciji radnih mjesta, ali su ga zbog određenih nerazumijevanja povukli iz procedure. Ostao je samo zahtjev za formiranje Jedinice za internu reviziju, na što je Ured za reviziju institucija BiH ukazivao.

Na upit predsjednika Nezavisnog odbora Enesa Obraliće, a u vezi s eksternim premještajem policijskih službenika iz drugih policijskih agencija, direktor je istakao da je do njegovog dolaska na čelo Direkcije 21. 6. 2023. bilo 9-10 prelazaka. Bilo je i jedno unapređenje, a od 21. 6. 2023. preuzeta su dva policijska službenika iz Državne agencije za istrage i zaštitu, jedan u činu samostalni inspektor, a po zanimanju diplomirani pravnik, kako bi preuzeo funkciju predsjednika Disciplinske komisije, a drugi u činu stariji narednik, jedan policijski službenik prešao je iz Direkcije u Državnu agenciju za istrage i zaštitu, jedan u Graničnu policiju BiH i jedan iz Granične policije BiH u Državnu agenciju za istrage i zaštitu.

Dalje, na upit predsjednika Nezavisnog odbora Enesa Obraliće u vezi s donošenjem Odluke o određivanju osoba, objekata i vrijednosnih pošiljki koji se štite, direktor je istakao da je na snazi još uvijek stara odluka iz 2005, a da je nova odluka još početkom 2023. upućena Vijeću ministara BiH na usvajanje koja do danas nije usvojena.

Na upit člana Nezavisnog odbora Milana Stanića da li rukovodstvo Direkcije ima neke konkretne stvari koje bi se eventualno predložile prilikom izmjena i dopuna Zakona o policijskim službenicima BiH, direktor je istakao da su i oni kao i druge policijske agencije za mogućnost da se policijskom službeniku koji je ispunio jedan od uslova za odlazak u penziju omogući produženje radnog vijeka na određeni period uz ljekarski pregled, čime bi se smanjio nedostatak policijskih službenika.

Na kraju su članovi Nezavisnog odbora naglasili da će i dalje, u okviru svojih nadležnosti, pružati podršku radu Direkcije za koordinaciju policijskih tijela BiH i poželjeli im mnogo uspjeha.

POGLAVLJE IV. SARADNJA S MEĐUNARODNIM ORGANIZACIJAMA I OSIGURANJE JAVNOSTI RADA

Najave svih sjednica Nezavisnog odbora se blagovremeno dostavljaju predstavnicima OHR-a i Delegaciji Evropske unije u BiH čiji su predstavnici prisustvovali većini sjednica Nezavisnog odbora.

Sve sjednice Nezavisnog odbora pratili su i zaposleni u Sektoru za odnose s javnošću Sekretarijata Parlamentarne skupštine BiH. Javnost se može upoznati s radom Nezavisnog odbora i putem akata koje je ovaj odbor usvajao i putem zapisnika, jer su objavljeni na internetskoj stranici Parlamentarne skupštine BiH. Na ovaj način osigurana je transparentnost rada Nezavisnog odbora.


POGLAVLJE V. ADMINISTRATIVNO-TEHNIČKA PODRŠKA RADU

Zajednička služba Sekretarijata Parlamentarne skupštine BiH je, prema Zakonu o nezavisnim i nadzornim tijelima policijske strukture u BiH, zadužena da pruža svu administrativno-tehničku podršku radu Nezavisnom odboru. Zajednička služba osigurala je potrebne uslove za rad Nezavisnog odbora angažiranjem stručnog osoblja, ali i osiguravanjem materijalno-tehničkih i drugih uslova za nesmetan rad.

POGLAVLJE VI. PREPORUKE I ZAKLJUČCI

Nezavisni odbor realizirao je programske aktivnosti planirane u 2023. godini, a u skladu sa Zakonom o nezavisnim i nadzornim tijelima policijske strukture Bosne i Hercegovine.

Nezavisni odbor predlaže Parlamentarnoj skupštini BiH da usvoji Izvještaj o radu Nezavisnog odbora kao nezavisnog tijela policijske strukture u BiH za 2023. godinu.



PRILOG: Tabelarni prikaz održanih sjednica i prisustvo članova Nezavisnog odbora u 2023. godini

